

Empat nyawa melayang

Harapan lanjut pengajian terkubur lepas kenderaan langgar penghadang jalan, jatuh gaung sedalam 90 meter

>>Oleh Ahmad Othman
metrojb@yahoo.com

KOTA TINGGI: Mereka baru selesai menduduki Sijil Pelajaran Malaysia (SPM) dan bersama-sama meninjau peluang melanjutkan pengajian di pameran pendidikan dan kerjaya di Johor Bahru.


Bagaimanapun, semua harapan itu terkubur apabila empat daripada enam remaja yang menaiki Toyota Innova terbunuh selepas kenderaan pelbagai guna itu melanggar bucu penghadang jalan serta papan tanda lalu terjunam ke dalam gaung sedalam 90 meter.

Lebih mengerikan, bumbung kenderaan itu terkopak menyebabkan seorang mangsa tercampak keluar dalam kejadian jam 5.30 petang di Kilometer 33.7 Jalan Johor Bahru-Kota Tinggi, dekat sini, kelmarin.

Empat yang maut ialah Ng Sin Yun, 17, dari Jalan Kelu Ramu, Kota Kecil; Winnie Ng, 18, dari Jalan Moi Hiang, Kota Kecil; Tey Jia Xin, 17, dari Kampung Lukut Cina serta Ching Hui Sean, 18.

Ng yang duduk di tempat duduk penumpang belakang tercampak keluar dari kenderaan itu dan mati di tempat kejadian.

Pemandu, Victor Ng Wee Tai, 17, cedera dan dirawat di Hospital Kota Tinggi (HKT) sebelum dirujuk ke hospital swasta di Johor Bahru atas permintaan keluarga.



Rakan mangsa, Tee Heng Chong, 17, berkata keenam-enam rakannya itu baru selesai menduduki SPM di Sekolah Menengah Kebangsaan (SMK) Bandar di sini.

"Kami mengunjungi pameran pendidikan dan kerjaya di Pusat Konvensyen Antarabangsa (Persada) Johor Bahru dan ketika kejadian, dalam perjalanan pulang.

"Kami pergi dengan menaiki Innova berkenaan manakala yang lain menaiki bas," katanya ketika ditemui di Unit Forensik HKT.

Menurut Tee, dia baru tiba di rumah apabila dimaklum-

kan kejadian itu dan amat sedih kerana apabila kehilangan empat rakan baik sekali gus.

"Keempat-empatnya bercita-cita tinggi dan semuanya mahu berjaya dalam pelajaran serta kerjaya," katanya.

Sementara itu, Ketua Polis Daerah Kota Tinggi, Superintendent Cik Mahazan Cik Aik, berkata seorang daripada mangsa terbunuh di tempat kejadian manakala tiga lagi mati ketika dirawat di Hospital Kota Tinggi (HKT).

"Semua mangsa mati akibat kecederaan pada badan dan kepala. Dua lagi mangsa ma-

sih dirawat dan keadaan mereka stabil.

"Kejadian berlaku ketika cuaca baik dan setakat ini siasatan masih dijalankan untuk mengenal pasti punca kemalangan," katanya.

Menurut beliau, pihaknya juga masih menunggu untuk merekodkan kenyataan daripada mangsa terselamat.

Kes disiasat mengikut Seksyen 41(1) Akta Pengangkutan Jalan (APJ) 1987 dan saksi kejadian diminta tampil membantu siasatan.



PILU...anggota keluarga mangsa sebak ketika ditemui di Unit Forensik HKT.



KOPAK...bumbung Innova tercabut selepas terjunam ke dalam gaung.

Wanita hamil maut nahas

MERSING: Dua termasuk seorang wanita yang sarat mengandung maut manakala dua lagi parah dan lima cedera ringan akibat pertembungan membabitkan Proton Wira dan Waja ketika hujan lebat di Kilometer 10, Jalan Mersing-Felda Nitar di sini, semalam.

Dalam kejadian jam 1.30 tengah hari itu, Wong Chia Hui, 26, yang sarat mengandung dan berasal dari Taman Desa, Kluang serta Chan Hui Wen juga dari daerah sama mati di tempat kejadian akibat cedera parah di badan juga kepala.

Kedua-duanya menaiki Wira berkenaan, mereka yang parah adalah pemandu dan penumpang kereta itu, Ahmad Abdullah, 36, serta Teo Roy Shan, 27, kedua-duanya juga berasal dari Kluang.

Pemandu Waja, Fadzli Aziz, 22, serta empat lagi anggota keluarganya pula cedera ringan.

Fadzli berkata, dia sekeluarga dalam perjalanan dari Nitar ke Bandar Mersing untuk pulang ke Felda Tenggara 2 selepas menghadiri majlis perkahwinan ahli keluarga.

“Sebaik tiba di tempat kejadian, saya melihat Wira terbabit yang datang dari arah depan memotong sebuah kereta sebelum hilang kawalan lantas melintang di tengah jalan.

“Saya gagal berbuat apa-apa kerana kejadian berlaku dengan pantas, pada masa sama, jalan juga licin akibat hujan,” katanya ketika ditemui di Hospital Mersing.

Menurut Fadzli, sekiranya

mengelak, mungkin dia sekeluarga pula yang maut kerana Waja itu berkemungkinan terhamban ke dalam gaung bersebelahan.

“Bagaimanapun saya bersyukur kerana kami semua terselamat, hanya anak saudara, Aqil Syaman yang berusia dua tahun luka ringan di kepala akibat terhantuk,” katanya.

Sementara itu, Ketua Polis Daerah Mersing, Deputy Superintendan Mohd Nor Rasid berkata, sebuah jentera Jabatan Bomba dan Penyelamat dipanggil untuk mengeluarkan mangsa yang tersepit.

“Ini adalah kemalangan maut kedua berlaku dalam tempoh 24 jam di daerah ini dipercayai akibat jalan licin selepas hujan lebat,” katanya.



CHAN...maut



WONG...maut

REMUK...anggota bomba berusaha mengeluarkan mayat mangsa kemalangan yang tersepit.